

三原縣新志卷之五

知縣焦雲龍重修

邑人賀瑞麟編纂

官師志第五

余讀詩至甘棠篇而嘆召伯之德之入人深也後世宦於其地往往身甫去而民即忘之若文翁於蜀朱邑於桐鄉龔黃召杜彪炳史冊豈易言哉然果流風善政卓有可傳據實書之存前人法後人也至其事蹟無所表見而姓氏未可遽湮具錄之以俟後之君子云

明以前職官見列史不具書而明則知縣丞主簿典史教諭訓導二建忠驛丞稅課大使陰陽訓科醫學訓科僧會司道會司

國朝因之一員訓導而裁主簿驛丞課使陸稼書謂明代郡邑志

官師多斷自明初宋元以前止存一二蓋功德不足及遠歷久

三原縣新志 卷五

一

湮沒亦其勢然也明之官師不能盡載於今猶宋元不能盡載於明今仿其例晉以下載其最著者 國朝則備列之皆見前志其新增者又各以類分志焉

晉一人

杜軫字超宗成都人初舉孝廉除建甯令又除池陽令爲雍州十一郡最百姓爲立生祠得罪者無怨言祀名宦

唐三人

王播字明別家揚州爲監察御史京兆尹李實表播爲三原令邑中豪強犯法未嘗輒貸課最實重其才更薦之

史憲忠字元貞隴州刺史會昌中築三原城吐蕃因數犯邊拜憲忠爲涇原節度使吐蕃遣使請墮城願以嘗殺使者之人輸

塞上憲忠謝曰前吾未城爾犯我地安得禁吾既城爾殺吾使

爲負宜先取罪人謝我將無所不得今與爾約前節度使事一切置之吐蕃頓服

陳藏器四明人開元中任縣尉著本草拾遺以上皆祀名宦

宋一八

呂大鈞字和叔藍田人初學於橫渠卒業於二程中乙科調秦州司理參軍改知三原有惠政請代父贲入蜀移巴西縣祀名宦

金一人

蕭邦傑令三原有善政清慎才敏極一時之選祀名宦

元六人

趙公諒字允升櫟陽人泰定甲子進士以甯州判官調三原縣尹重建龍橋樓立加封大成至聖文宣王聖號碑作廟學記李

三原縣新志 卷五

二

志稱其文章吏治兼擅其長累遷右司郎中進工部尙書

李誠字克誠渭南人辟隴西右憲司史除雲南知事擢尹三原時河南賊寇不軌大兵徂征轉粟挽芻賦役倍他日誠量戶高下而均其徭民無苦病一境安堵

陳思道新安人爲河南行省左丞至正二十六年關中多故以平章張良弼檄移守三原首謁孔子廟立學宮旣宏且麗生徒濟濟文物煥然至今稱之

朱春至正末爲三原尹明兵克奉元春謂其妻曰吾當以死報國妻曰卿盡忠妾豈不能盡節俱投崖死王康僖別立專祠於南門內

雷貴高陵人爲縣主簿猛不殘義寬不宥姦

張繼祖至正年任建鐘樓以上皆祀名宦

知縣明二十四人

陳榮戎縣人永樂元年任撫民慈愛守己廉慎民多稱頌祀名宦

劉耽武定監生朔望詣學宮與諸生講解咸有進益治亦多善政祀名宦

楊聰字彥達雄縣舉人正統元年任剛斷有為事無壅滯囹圄空虛鋪遞舊從涇陽繞道至本府道路迂遠請改正南事無稽遲邑里二十有八撫卹數載至七年新增崇明廣智永豐三里九年秩滿保畱陞正六品俸仍知縣事民為立碑祀名宦

朱芾溧水監生景泰三年任平易近民事亦辦集祀名宦

莫謙大興進士天順四年任襟懷灑落見事敏捷善題咏士林稱之

三原縣新志 卷五

李景藝字邦泰儀封進士成化六年任慈祥愷悌政務修舉遇節序誕辰許民慶賀亦閒至民家頗受餽遺然民咸愛戴立石頌德陞太僕寺丞後遷四川參政過縣士庶戀戀畱十日乃得行祀名宦

張曉撰去思記云邑民四時節禮浮華而禁革以省兀費吉凶大禮過度而戒諭以止奢靡流民間

風來者給以田產窮民不能葬者施以棺木尤究心學校重建大成殿六楹其規壯麗宏敞於前

龐輔鄉甯舉人成化十四年調自奉儉薄注意民瘼剛腸勁骨不媚上官杜私買絕餽送上官怒或誣以他事笞之已而持節如故無所搖奪以此民安業受惠良多後陞知階州士民懷思比之趙清獻包孝肅云祀名宦

馬龍字文祥齊東人以進士授刑科給事中上書忤旨謫岐山

丞宏治二年巡撫薦知縣事歷任四年政教兼舉陞汝甯同知

民立去思碑祀名宦

張奎撰遺愛記云節操冰霜門無私謁號令金石人有定守重農桑均賦役折獄清

明馭下嚴重修堂建號先拓學宮之規模命題講義成就人才
之放失遇旱虔禱而大雨逢火拜祝而反風
易以金錫倉廩棟宇傾頽創之堅良 文廟祭器苦歲

謝鵬衛輝舉人宏治六年任勤慎能幹得牧民之道祀名宦

林洪博江西南城舉人宏治十五年任重刊邑志

程啓克嘉定進士正德四年任才敏識優政持大體民有罪咎

之不過三杖而已以七杖爲重刑然民皆畏服境內肅清邑有

山西妖人李午以術惑眾將舉兵乃以微罪收其黨午懼而逃

之洛川後洛川事起三原無患擢監察御史祀名宦
呂柟撰去思記云力

正婚喪繩之以禮僧道施食民死弗召若服食踰數並論以法督率髦士濟濟有烝

張治潁川衛舉人嘉靖十四年任數月卽解任去君子稱其恬

退祀名宦

穆甯中字允執號平津進士甫下車廉知俗鮮力本競尙浮華

三原縣新志 卷五

四

號爲富庶實則非然蹙然日邑固以虛名而受重困乎乃日勸

民力農桑尙節儉又嚴學校絕請謁餽送供應之規鄰邑無不

願屬穆君由是受委叢沓奔馳無虛日嘉靖乙卯冬十二月非

常地震人死十之三壞屋十之八九盜賊羣起人心洶洶賴公

安輯後以丁內艱去民咸思之祀名宦來聘有去思記

高進孝字可愚獲嘉進士萬曆十七年任政清吏肅能詩文與

溫恭毅同建橋繕城爲巡按劾去官數載囊無私貯後治兵慶

陽道經三原百姓擁轂奉觴悲涕不忍別爲立祠孺南邑人來

復有記祀名宦

張應徵字元聘別號停一猗氏人年弱冠登萬曆乙未進士卽

任三原時縣隸結郭西黠民爲奸應徵至摘其首惡罪之黨卽

解未浹旬才望大著性儉樸食常一盞夫人無繒采邑事悉從

節省三載案無累牘民不飾奸獄無滯冤農有餘積以循績遷南比部去既久民思之爲立石通衢祀名宦

沈琦字仲玉吳江進士補高陵踰月移三原時萬曆二十七年也或曰邑五方民縮馘以居黠猾難治非震懾何以爭長琦答曰三尺俱在奈何以民命立吾名及視事惟教諭風曉德意煦濡之境內遂有寬然無事之樂居五年拜命禮部瀕行衣無增帛篋無畱俸更見廉介之操祀名宦

李棲鳳字翀寰臨晉進士萬曆三十三年任不弛不激按嘗法者數人重寘之法羣奸服慄民愛士附上官薦章十數上五年陞任去祀名宦

何朝宗道州人萬曆三十八年任有循吏聲相傳疏濬三里渠斬木導水勞於民事又大繩諸不法云祀名宦

三原縣新志卷五

五

楊之璋字錫之河內進士萬曆四十年任歲比不登緩征平價民不至大困他如明讞訊均編審蠲贖緩懲黠猾濬河渠至今人猶樂道之祀名宦

姜兆張字省宇掖縣進士下車問民疾苦爲鋤強暴有嫌其風節過峻者則曰稂莠不除嘉禾不生越二年調長安士庶無老幼擁車悲涕不能行後官憲副以勞瘁卒民爲立祠思慕之祀名宦

涂有祐字受伯銅梁進士清慎勤敏政事之暇宏覽博物登山臨水不廢吟咏聽訟迎刃而解凡所剖斷兩造成服尤嚴城守除盜寇修學宮厚章縫善政不可盡述邑南門外有專祠以誌廉明祀名宦

李昌興濟進士萬曆閒任潔己臨民不污泳操及解綬去行李

蕭然有古循吏風祀名宦

劉昌祥符進士天啓七年任精於吏治案無留牘民無伏奸值流寇猖獗所至攻陷邑震恐昌乃明偵謀練土著慎封守綏輯持重數載境無恙丁內艱歸邑創祠尸祝祀名宦

陳辰頌字我恂濟甯進士崇正閒任志操清白不染片私緩徵催剔吏弊課士子拯流離勦除彭寨強寇士民去後益思祀名宦

國朝順治閒六人畢大忠山西貢生二年任

李溥字雷澤鄆陵人順治乙酉舉人丙戌進士三年任英爽機辯有幹才膽略事無巨細應決不少滯尤善發摘吏民惕息又喜誡諧善默識凡諸紳士姓名行履及其瓜葛姻親雖猥瑣如謔名小字皆能道之時流氛未靖飄忽聚散數伺縣城溥繕城

三原縣新志卷五

六

雉堞增樓櫓練鄉勇遠遊探晝夜乘城守之賊數十至無隙可投一夕有偵騎報賊期三鼓抵城伏某某爲內應溥神色自若徐呼更夫密語命通宵以二鼓聲達且賊候至鷄鳴知謀洩而遜其守城也舉各方紳士聚城樓以督戍堞之夫常屏燈火從二三健兒緩步巡視問指一樓曰此非某某分直地耶卽少憩其中及去又復突至或飲酒談風雅稍及家事就其文質與語莫不快意自是無敢不夙夜城樓者九年春賊破西鄉王堡恣剽掠據嶽薛山溥馳檄借兵鎮將馬靜宇搗其巢穴獲三百餘人盡殺之南郊境得甯息是歲遷戶部主事原人肖像立祠於學宮左翰林學士岳映斗勒碑記功祀名宦

朱應豸山東貢生九年任張問行江西貢生十一年任

駱復旦字叔夜浙江山陰明經性敏捷擅文名著有至樂堂詩

集十二年以推官改授至榜其庭曰願爲真父母由是均結爲擒巨盜令簡刑省與民休息公暇手一編與及門相考訂好集古石刻校勘真贗歷官三年貧如赴任時會以水利事論逮久之得白補江西崇仁縣祀名宦

林遜侯官人十七年以明經任律已嚴峻臨民慈祥無纖毫私竇尤好植士類越六年遷開州邑感其德擬建祠勒碑遂聞切禁止之祀名宦

康熙間十五人董遂升貢生四年任陳延祚遼陽正紅旗人七年任沈礎楹慈谿舉人十年任傅爾忠海州鑲黃旗人十一年任

徐勅字戢齋鄞縣人康熙癸卯舉人甲辰進士十三年任時平慶寇逆徵繕供億各上游以軍令悉索三原其他邑乃苦心調劑嘗身先百姓請命多賴安全又屬意人才雖刁斗傳呼閒猶有相隨問業者越三年內遷中翰後歷官御史祀名宦

翁鼎祖清江吏員十七年任葉章期餘姚籍大興吏員十九年任張廷獻景州歲貢二十二年任湯爲雯江甯監生二十五年任

俞璉字商臣蕭山人三十一年以靖遠衛經歷陞授下車當歲大饑開倉拯救散粥施粟必躬親胥吏不得作奸全活甚眾又招徠流亡數千戶日履畝勸墾不爲疲訟獄必反覆推勘使無枉屈任七年卒於官邑人士斂金治裝資之歸蓋由吏員通籍公忠清亮絲毫不妄取論者比之沉鍾而惠愛及人爲近代名宦第一繼之者爲

李瀛字三山號敬園山陰康熙丁卯舉人甲戌進士三十八年

任時邑苦偏稅里民馮應昌等控闔叩闈情終上達瀛申詳分併三關自是商賈流通稱殷繁矣邑志自王端毅編後中間隨時補苴脫落不完乃倡邑人爲纂修補備一百七十餘年事蹟尤崇文重士後內遷主政邑人以併稅功建恩德祠皆祀名宦顏之珽仁和舉人四十六年任陳大純會稽監生五十七年任張徵九單縣歲貢五十八年任劉子正巴縣廩生六十年任雍正閒四人呂瑚福山監生三年任劉世熹黃平府進士六年任侯梁鑲黃旗漢軍監生七年任李昌宗孟縣舉人十年任乾隆閒前志十三人高至行江陰舉人元年任金世緯江浦舉人四年任鍾一元海甯舉人十年任蔡維勸平遠人十七年任王秉韜鑲紅旗漢軍舉人二十四年任李含初廣元拔貢二十七年任

張象魏字月瞻號曉夫廣豐舉人二十九年任學問淵博洞析民情修文廟復書院嚴革里書飛灑催頭侵欺諸弊土工分界把持脚行混拉馱畜尤痛懲之姦牙以小秤小斗欺壓貧民卽禁飭用較準天平斗秤除包糧鋪以杜重索設普濟堂以先無告民甚利之勒石記事而其大者纂輯邑志尤爲有功三山李公云

張思勉鑲黃旗舉人三十三年任

崔龍見蓋守張公象魏舊約而力行者也字翹英號漫亭永濟進士三十年任茹蘖飲冰易直子諒除里胥無額之賦歲省民二千餘金牙僧不得拘行旅車馬米薪百物道路流通郵悍獨勤聽訟重建櫺星門如制增書院膏火有碑記

顧增華長葛舉人三十七年任任文溥上高拔貢四十年任王

杏畧合肥舉人四十三年任黃四岳正紅旗舉人四十六年任其新增乾隆閒猶有四人而三人皆缺名王某靈石廩生四十八年任陳某江西甯州監生五十二年任周某天津舉人五十五年任任天桂高密副貢五十九年任

嘉慶閒四人楊馨沅邛州舉人四年任趙某大興監生七年任程鵬陽湖附監九年任慈良愛人至今猶有程婆之稱

翟鳳翔字桐墅靈石進士十七年任別釐十餘年逋租去民積累精明強幹數十年稱能吏者無逾焉後陞四川甯遠府

道光閒六人雲麟字蘭舫正黃旗漢軍進士元年任事母孝風雅愛士清查各社倉糧年久侵虧自爲捐辦三十餘石寄存常平不以累民後官至延榆綏兵備道

陳俊儒成縣舉人三年任重學愛士政暇輒親詣書院嚴誨諸生如其父兄以望誤去官士論惜之

王壬垣蓬萊舉人七年任純雅重儒如陳公試士夫人親造餅分給諸生

孫玉樹江蘇通州舉人十一年任慈惠樸誠公生子富室有餽小兒項飾者公感其意一繫兒項仍謝還之臨去有贖數百金

潛置輿中旋知峻卻之鄉嫗餽斗米亦不受固請乃受蓋其廉潔近世罕有比者

陸銓字楷山婁縣監生十五年任周賡盛鎮洋舉人二十三年任有才而性暴信門丁縱衙役民畏之至有冤不敢伸獨治某

姓奴欺主母一事重杖問罪人爲之稱快

咸豐閒二人舒鈞字魯一秦州舉人真樸愛人民無怨言

余庚陽字葵階湖北監利進士元年調授後署他邑九年復任

文學政事爲一時冠宦秦三十餘載歷任數邑皆著循聲在三原前後十年實心愛民至婦孺皆呼爲余爺教士重品行刻朱子小學分給里塾嚴正自持劣矜刁民皆斂迹然有養雖甚怒但日可惡未嘗一惡語嫚罵人微有過舉相知門生或密以聞輒改正同治壬戌定回亂尤得人心紳商自捐金錢共若干緡兩備調度鄰邑健兒聞急赴援大破賊立賞三千金力保危城凡十八月晝夜登陴無一日閒籌餉練勇用白金幾二十萬兩一委紳士職出內賊平詳請蠲緩征徭上憲批答有涕泗霑襟語通飭被灾各州縣傳視以爲法以守城功保薦循良第一

御展書名

丹臺記注升乾州知州畱辦善後未之任公

憂撫卹無資義紳劉映菁遂出二萬四千金散給闔邑牛種蓋感公誠意全秦無有也立永遠局以寬里差減加耗歲省民六七千金或議公取名亦不恤同治初舉孝廉方正特選能符斯典之人書院例課文獨稟撫憲禮延邑貢士某講明正學振興文教並令續纂邑志稿本後署同州知府致仕貧如故主講宏道書院卒三原紳士爲製棺誌石賻送歸柩並繪圖立碑刻詩蓋久而不忘云光緒初祀名宦

三原縣新志卷五

十

同治閒一人朱錫祺廣西博白進士七年任凡三至原前皆以事去後以憂去居心詐僞好修私憾監利余公減加耗已歷數任乃藉故每兩仍增多一錢四分民皆怨之

署篆前志皆不載予謂可載者不能不載也遠莫考近有徵也若無可載仍闕焉其繼廢盛者高傳薪字子良不畱民訟以儉率下吏胥無敢衣帛者繼舒鈞者蕭爲光字航溪峻厲有風骨時禁演戲學憲承差獨違令立召優人箠逐之得罪督學不顧

也涇陽民霸截白渠水不至原者二十餘年親攜襪被止宿三
限口分水上渠涇陽民不敢爭終任每月水輒至繼余公者唐
正恩字需亭巴州刑部主事請叛產房屋撥歸書院以資膏火
性慈良而少明決然守余公減耗未嘗變繼錫祺者前有趙嘉
肇後有庾文潢嘉肇字孚民山東蘭山舉人廉明敏幹善知人
一時敗類無敢至衙署者勤課士尤有好賢風清均糧地專委
任精剖決別釐邑二百餘年積弊惜未葺事以調簾去文潢字
仙舫湖北鍾祥舉人潔己愛民禮賢下士一出於至誠光緒丁
丑夏甫蒞事旱象見卽不飭一差下鄉催徵旣成災首捐千金
籌賑恤加惠飢民全活甚眾夫人亦捐金釧收遺孩初渭南屈
匪等戕蒲令縣境惡徒聞風糾黨潛煽搶掠勢岌岌不終日密
捕獲之請戮三人而事定尤善收撫涇陽潰勇然性孤直狷介
邑有誣案將痛治之鬱不得伸其志轉亦被誣遂憤懣不自克
亦不自白後竟飲藥卒士民聞而冤之至有泣下者

焦雲龍字雨田山東長山進士光緒四年任

夫國家二百餘年而官吾邑者其政績可紀錄尙不能逾有
明其間蓋有湮沒者矣不然何其不多也兩漢循良後世多
謂難繼于北溟陸稼書非今人耶其宰邑蓋孔門之爲政也
人奈何不自勉哉

劉志有題名而無傳張志題名名宦各自成卷今依年次并
載之有傳者卽附其下亦古人志例苟欲尙論前人亦可以
觀矣張象魏崔龍見舊無傳據諸家碑記補之吾秦如康對
山武功韓五泉朝邑呂涇野高陵孫立山富平諸名志官師
皆善惡並書所以示勸懲有良史風乎師其意而多主揚善

故茲所纂錄如此然或行事可戒亦略書之以警後其現在雖有著蓋有弗得書者謹之也

縣丞明七人仰山洪武二年任有建儒學之功韓士文辛邱人永樂十年任公勤廉潔吏民懷服郭忠徐州吏員宣德八年任熟吏事政公平民多稱之陞秦州同知祀名宦楊能豐潤監生景泰四年任處事安詳有功廟學邢彪字德威曲沃監生宏治四年任博學篤信公廉正直苞苴關節不通一如龐尹而儉過之衣布茹蔬以是終身下鄉收糧勘事自裹乾餼無分毫擾民後考罷去方自餉邊而歸至滄化聞信卽不入邑然貧不能歸居咸甯陋室日誦經籍有得輒筆之意泊然也祀名宦白廷佐興縣監生嘉靖十二年任律身清白無愧民牧魏泰徵字華辰濟甯恩貢崇正閒任潔己愛民細行必矜三載蓮幕有清風皓月之況皆祀名宦

三原縣新志

卷五

三

國朝順治閒三人司馬詢高道生四川人沈德普康熙閒九人朱廷楷魏縣選貢六年任清儉自持長厚能容攝邑事半載度人情土俗以施政教民甚便之陞清澗知縣祀名宦史名臣會稽吏員周之昌山陰吏員齊七政東阿例監林元燾長樂人二十八年任守己不污佐治有道嘗呼客傳杯臨流拈咏稱風流賢吏遷禮縣令祀名宦陶墉秀水人三十年任雅度冲襟才識敏徹政務井然修舉以憂去皆監生袁祖根山陰吏員王之賓錢塘人周必達長洲監生雍正閒二人查遴仁和人戈居邦南昌人皆監生乾隆閒前志十人夏峯嘉興監生李協中昌邑副榜張培坤上海人李振祖大興人楊成材四會人李實薰漳浦人皆監生而實薰善草書修白渠有功有自記見水利篇二十

七年任溫崧曾烏程舉人蔣維炳蕭山副榜侯長熺鄒城拔貢董椿青浦監生

新增五人徐某任某李某名皆逸徐廬江附貢李長山舉人符

國琛仁和監生元璣天津拔貢嘉慶間一人陳元杰仁和監生

道光間四人程柱嘉善人陸芳榮大興人周嘉會吳靖溫縣人

皆監生靖好親賢士後保陞安康知縣同治元年川匪破城死

之咸豐間一人馬文龍稷山人回亂守北城城陷遂逸同治間

三人孫繼祖王炳輝涇縣監生屠兆麟宛平監生現以俸滿復

任主簿明三人劉信朔州吏員成化二年任存心平易處事勤能

劉純定襄監生宏治六年任勤謹和易起造櫺星門三間趙昂

開州監生正德二年任好恤貧獨不畏高明平居接物怡如愉

三原縣新志 卷五 三

如或有關節則干搖百撼不可以動然聲色如常故人以有道

稱之當路或委以政事即所在底績蓋其廉正如龐如邢其寬

而栗直而溫則無能同者後陞博興令皆祀名宦

典史明一人程霖浮山吏員嘉靖六年任今按馬谿田送詩有

受檄剪荆棘當道驅豺狼提戈方在郛四境武已揚之句

國朝順治間三人孟尙忠鍾詮張浩習詮十五年任知縣駱復

且擒巨賊其畫策多出之詮陞眉州吏員祀名宦康熙間十人

聶宗武仇士貞定平人何士鳳山陰人十年任時西南不靖環

慶流寇乘間攻掠諸邑戒嚴士鳳晝清街夜乘城歷勞三載祀

名宦章宏德昌平人周可模會稽人以下皆吏員申進舜中牟

人李文宗洛陽人劉震考城人張敦信柏鄉人趙廷銓順天人
雍正間三人俞念繼宛平人劉應庚陽曲人胡松懷柔人亦皆

吏員乾隆閒前志六人趙城山陰人薛大鵬宛平人林明峻鎮平人皆吏員張瑛宣化西甯監生張峻業大興吏員盧珪錢塘監生

新增二人吳光鐸大興供事侯來勳浮山監生嘉慶閒二人汪某宛平人沈長庚皆供事道光閒三人周世德瀘溪人陳繼曾大興人皆監生陸慶松涿州供事咸豐閒一人鄧澧江甯監生同治閒二人沈國采仁和人秦纘先安徽人皆監生方傳瀛桐城監生光緒五年任

位雖有崇卑官雖有大小然莫不有職焉丞尉亦朝廷命官豈無可自盡者而世多卑小之亦人自卑小耳孔子爲委吏乘田程朱爲簿皆大聖大賢人也劉絢游酢亦嘗爲尉有志者可以奮矣或謂丞尉不得可否事然則若彪若廷楷若

元燾若詮若士鳳又何以稱焉

官以治民師專教士固也然師豈後丞尉孫西峰曰重之故別之予從其說焉

教諭明六人解鏘棲霞監生永樂十五年任考滿保畱復任明易詩書三經教訓有方士登賢書捷南宮者甚多張本河內舉人正統元年任居躬樸誠教誨勤摯劉亮洛陽舉人十二年任博學善誨諸生賴焉子健隨任受學官至吏部尙書文淵閣大學士爲一代名臣張奎裕州舉人宏治三年任學規嚴肅訓迪有方張信陵川舉人十八年任政績未傳以上皆祀名宦申偉陽曲舉人正德九年任今按張玉坡原贊其像云風度如瓊林玉樹才華如原泉重淵文章如珠璣玉環心地如白日青天

國朝順治閒五人趙粟平涼歲貢高貫斗吳堡恩貢白乃忠鳳

翔人多大任靈臺人袁爾佳延川人皆歲貢康熙間十人王恂
延川人李天篤安定人皆歲貢黎時雍甯夏人百補宸清澗人
侯度憲鳳翔人皆舉人閻三極肅州歲貢王襄平涼舉人姚祖
頤延安人孫佳罷崇信人皆歲貢高子穎清澗舉人有傳者三
時雍字叶徵八年任文風學規勵志整飭造就孤寒尤爲加意
補宸字袞五十七年任寬厚坦白士樂近之造就人才一時稱
盛陞甯夏衛教授袞字升卿三十八年任學問淵深訓迪不倦
陞漢中府教授皆祀名宦雍正間三人宋朝槿隴西舉人王體
正七年任學問優贍清介不取經其指授者率掇科第尤精顏
魯公書法祀名宦郭子瀚皆蒲城舉人乾隆間七人梁鵬程蒲
城舉人劉得炯中衛人王燕龍城固人皆舉人李蔭椿甯夏進
士張爾誠王桂皆朝邑舉人董廷式洛川舉人

三原縣新志卷五

新增一人李逢泰懷遠舉人嘉慶間三人陳志經商州人王文
衡甯遠人王國祺武威人皆舉人道光間三人薛兆麟韓城人
勤於課士潘登墉華州人魏意醇長武人皆舉人咸豐間二人
崔廷傑三水人劉繼寵朝邑人皆舉人同治間一人郭維屏澄
城舉人曹鍾英延川廩貢光緒四年任

訓導明三人王藻太原人永樂三年任學行優贍訓誨勤苦夜
分始寐諸生多有造就段徽懷仁舉人宣德八年任有學有行
誨人不倦陞南宮教諭皆祀名宦呂鳴韶解州人舊志逸今補
馬谿田修省志與參訂

國朝順治間七人毛鳳彩延川人王化溇榆林人劉鼎新扶風
人武絃周膚施人劉顯府谷人楊馨扶風人李日新興安人皆
歲貢康熙間九人李景耀伏羌人喬瑄寶鷄人三十年任渾樸

樂易不爲曲謹立言持論皆本名儒以年老歸祀名宦張士瑾
洋縣人強勛安定人房世藩靖遠人薛鈞吳堡人閻鎮成縣人
任賁清湖人戴高合水人皆歲貢雍正開二人柳天眷鄜州人
佟宗湯合水人皆歲貢乾隆開七人王可輔靖遠人左拱極隴
西人馬星生清水人王銳隆德人郭體乾大荔人皆歲貢唐啓
賢淳化人王嵩年靈州人皆廩貢

新增二人田銓乾州舉人康某郃陽歲貢嘉慶開四人楊承恩
會甯人郭簡合水人皆捐貢呂高聞榆林人張聯翼郿縣人皆
廩貢道光開五人強振乾韓城廩貢高世猷岐山捐貢李廣廷
洛川廩貢楊懋績鳳縣歲貢懇惻有品卒於官至不能歸諸生
乃助貲送其柩王德銘城固廩貢咸豐開三人劉三甲扶風歲
貢馮樹勳米脂人王登齡南鄭人皆捐貢同治間一人李崇仁
朝邑廩貢張嗣祖綏德恩貢光緒四年任

三原縣新志 卷五

去

三代設學所以明倫今儒學皆以明倫名堂豈異於古所云
耶我朝尊崇聖道遠軼前代周程張朱表揚已至然則卽
以聖學教人又誰非之而誰禁之世顧曰科舉時文功令
也乃并此不教何也就使教之亦失立學之本意矣人才爲
天下根本教官爲人才根本吁可慨已

分防把總前志不載今考自道光以下得五人潘廷柱蔡芝任
起林皆西安人起林二十六年任從征湖南髮逆死之朱朝才
固原人咸豐中任同治三年又任馬得彪耀州人

三原縣新志卷之五終